

Inuiaqatigiinni ataqatigiinnerup pilersinneqaqqinnissaa qanoq ililluni qulakkeerneqarsinnaanera pillugu oqallinnissamik siunnersuut.

(Inatsisartunut ilaasortaq Knud Fleischer, Kattusseqatigiit Partiiat)

Akissuteqaat

(Naalakkersuisut siulittaasuat)

Naalakkersuisut sinnerlugit aallarniutigalugu Inatsisartuni ilaasortaq Knud Fleischer oqallinnissamik soqutiginarumik aallartitsisoqarnissaanik saqqummiimmat qujaffigissavara. Ulluni naalakkersuinerumik oqaluuserisassat akuttunngitsumik teknikkiuvallaartarneranni pingaaruteqarpoq paasissallugu inuiaqatigiinni tunngavitsigut pingaaruteqarlutik naleqassutsivut oqallisigissallugit aamma piffissaqartariaqaratta.

Ataqatigiinneq inuiaqatigiit kalaallini nalinginnaasumik pingaaruteqarluni naleqartutut Kalaallit Nunaanni isigaarput. Nunani killerni amerlaqisuni, pingaartumillu skandinaviami, imminuinaq eqqarsaatigisarneq oqallisaasoq Kalaallit Nunaanni ataqatigiinnerput ilaqutariinnerullu iluani sakkortuumik ataqatigiinnerput tulluusimaarutigiuarsimavarput.

Naleqartitat tamakku annertuumik pingaaruteqarput inuiaqatigiinni pisariaqartitavut ataatsimoorluta illersorniarlugit ataatsimut piginnaasavut pisariaqartikkatsigit. Ullutsinni inuk inoqatiminut atanissamik pisariaqartitsisariaqanngilaq nammineerluni inuuniarnissaminut pisariaqartitani pissarsiarisinnaammagit. Kisiannili tamatta ilisimavarput inuiaqatigiinni tamat oqartussaaqataaneranni immitsinnut pisariaqartikkatta inuiaqatigiinni atugarissaarnissaq attatiinnarniarlugu. Taamaammallu aamma pingaarluinnarpoq inuiaqatigiinni ataqatigiinnitta attatiinnarnissaa.

Ataqatigiittutut misiginermut sunniuteqartartut soorunami aamma allarpassuupput. Nunatsinni kinguaariit kingulliunerusut inerikkiartornerminni tamarmik immikkut assigiinneqisunik atugaqartarsimapput, tamannalu pissutigalugu aamma inuunermik paasinneriaaseqarsinnaasarlutik inoqatinillu isiginneriaaseqarsinnaasarlutik.

Inuiaqatigiit ilaanni upperisarsiorneq naalakkersuinnikkullu isummersorneq ataatsimuussuseqarnermut imaluunniit paarlattuanik avissaartuussimanermut aalajangiisuulluinnartarput. Nunatsinni inuiaqatigiit naalakkersuinnikkut patajaatsumik ingerlatsiffiusutut ilisimaneqarpugut, aamma nunatsinni naalakkersuinnikkut isummersortarnerit ukiuni kingullerni sakkortusiartoraluartut, taava apeqqutini pingaaruteqarlunartuni isumaqatigiissinnaasarpugut.

Inuiaqatigiit nutaanngoriartornerat ilutigalugu naleqassutsivut aamma nutaanngoriartortutut oqaatigineqarsinnaapput. Ataqatigiinneq siusinnerusukkat qaniginerpaasani taamaallaat nassaarisinnaasimasarput massakut angalanissamut periarfissat qarasaasiatigullu tusagassiuutit nutaat aqutigalugit siammarternikuupput. Taamaalilluni kalaallit ileqqoralugu ataqatigiinnerat unammillerneqarpoq. Peqataanilli oqartoqarsinnaavoq ineriartorneq ilaqutariit akornanni ataqatigiittoqarnissaanik aamma periarfissimmat, naak immitsinnut ungasikkaluarluta ilaallu nunani allani najugaqaraluartut.

Taamaammat inuit ataasiakkaat akornanni ataqatigiinneq aamma allanngorsimavoq, taamaakkaluartorli tamanna ilisimalluarparput. Tamanna tunngavigalugu ukiuni kingullerni suliniutit arlaqartut aallartinneqarsimapput kalaallit ataqatigiinnerannik ingerlatsiinnarlutillu sakkortusaasussat.

2009-mi juunimi Kalaallit Nunaanni Namminersorneq pillugu Inatsisip eqqunneqarnissaa kalaallit inuiaat ataatsimoorlutik akuersissutigaat, taamatuttaarlu namminiilernissaq pillugu kissaateqarneq kalaallit inuiaat ataatsimoorlutik aalajangertussaavaat. Uagut, inuiaat kalaallit, Namminersorneq pillugu Inatsit aqcutigalugu kiisami akuerisaavugut, tamatumani ataatsimoortuunerput avammut uppersarparput. Namminersorneq pillugu Inatsisip aamma kalaallit ataatsimoortuunerat nukittorsarpaa kalaallit oqaasiisa pisortatigoortumik oqaasiunerisa akuerisaanerisigut.

Taamaammat Namminersorneq pillugu Inatsisip inuiaqatigiinni nutaamik nukissaqalernissaq periarfissippaa. Massakut piffissanngorpoq ataatsimoorluta kivitseqatigiinnissatsinnut, soorlu Kattusseqatigiit Partiiata oqariartuutaa naapertorlugi inuk “nunaminik” sullississaaq, kisiannili ataatsimoorluta “nunarput” aamma sullisissavarput.

Nunarsuatsinni killeqarfeerukkaluttuinnartutut pissuseqartumi inuiattut anguniakkanik nutaanik aalajangersaavugut. Ataatsimoorfigisinnaasavut ataatsimullu iluaqutigisinnaasavut pingaartinnerusariaqarpavut, avissaartuuffiusinnaasut tunulliullugit.

Oqaatsit taakku oqaatigalugit pissanganartumik oqallittoqarnissaa qilanaaraara.